



Finansira  
Evropska unija



**Datum:** 30.12.2025.

**Broj:** 02-06-1024

## PREDSTAVLJEN ALAT 'PRISTUPI INFORMACIJAMA': KORAK KA VEĆOJ TRANSPARENTNOSTI U BIH

**Sarajevo, 30. januar 2025. godine** – Danas je u Sarajevu zvanično predstavljen alat „**Pristupi Informacijama**“. Ova platforma omogućava kreiranje zahtjeva za slobodan pristup informacijama prema svim institucijama u Bosni i Hercegovini. Alat, dostupan na adresi **pristupinformacijama.ba**, osim automatizovanog i intuitivnog procesa kreiranja zahtjeva omogućava građanima, medijima i organizacijama civilnog društva omogućava sastavljanje i slanje urgencija i žalbi te dobijanje podsjetnika za rokove za svaki korak procesa dobijanja informacija od javnog značaja.

*„Cilj ovog alata, čiji je razvoj podržala Evropska unija, je jačanje pristupa informacijama, čime se ne samo unapređenje transparentnost javne vlasti nego i stepen učešća građana u radu institucija. To je osnovni preduslov demokratičnosti, otvorenosti i odgovornosti institucija“* izjavila je Aurelie Valtat, šefica Odjela za EU integracije, politička pitanja, press i informacije pri Delegaciji EU u BiH.

**Pristupi informacijama** koristi intuitivan i jednostavan interfejs koji korisnike vodi kroz svaki korak kreiranja zahtjeva za slobodan pristup informacijama, te sadrži nazive i adrese nekoliko hiljada javnih institucija, organa, preduzeća i ustanova na **svim nivoima vlasti** u Bosni i Hercegovini kojima se građani mogu obratiti.

Nakon kreiranja zahtjeva, koji se potom štampa i šalje na adresu institucije, alat prati rokove te automatski dostavlja obavještenja o mogućnostima kao što su slanje urgencije ili žalbe, ukoliko javni organ nije dostavio traženi podatak ili nije odgovorio u zakonom predviđenom roku. Pored toga, građanima je ostavljena i mogućnost da **zatraže pravnu pomoć**, u slučaju da nisu u stanju da sami dobiju tražene informacije.

*„Želja nam je bila da građanima ponudimo jednostavan i intuitivan način da sami sastave zahtjev, kako bi od organa dobili informacije koje ih zanimaju, jer je to jedno od osnovnih prava koje se garantuje zakonima o slobodnom pristupu informacijama“* izjavio je Marko Vujić, saradnik za pružanje pravne pomoći u Transparency International u BiH (TI BiH), koji je, zajedno sa udruženjem Vaša prava BiH (VP BiH), implementirao ovaj projekat.

Potrebno je naglasiti da **Pristupi informacijama** omogućava sastavljanje zahtjeva prema svim javnim organima u BiH, automatski birajući adekvatan zakon u zavisnosti od nivoa i nadležnosti institucije od koje se traže informacije, što dodatno olakšava sam proces budući da u Bosni i Hercegovini trenutno postoje čak tri zakona koja uređuju ovu oblast.

Prezentacija alata Pristupi informacijama je bila prilika da se ukaže i na slabosti samog Zakona o slobodi pristupa informacijama u BiH, čija analiza otkriva **neusklađenu terminologiju** i nejasne



Finansira  
Evropska unija



odredbe o testu javnog interesa, neusklađenost ovog sa drugim aktima, neopravdano duge rokove i izostanak **adekvatnih kazni**, što sve otežava njegovu primjenu i umanjuje efikasnost u dostavljanju informacija od javnog značaja.

*„Zahvaljujući nejasnoćama i neusklađenosti sa drugim zakonima koje omogućavaju dvosmisleno tumačenje došlo je do neozbiljne i proizvoljne primjene zakona o slobodi pristupa informacijama u Bosni i Hercegovini, zbog čega je dodatno opao stepen povjerenja građana u rad institucija“* izjavio je Emir Prcanović, direktor udruženja „Vaša prava BiH“.

Takođe, istaknuti su **nedostaci u entitetskim zakonima**, poput nedostatka proaktivnih odredbi i neusklađenosti s međunarodnim standardima, kao i nepostojanja odredbi o inspekcijskom nadzoru u Zakonu o slobodi pristupa informacijama Republike Srpske.

Poboljšanje transparentnosti i odgovornosti institucija ključno je za jačanje povjerenja građana i efikasno funkcionisanje demokratskog društva, zbog čega TI BiH planira organizovati edukacije i radionice za medije i predstavnike civilnog društva kako bi se upoznali sa korišćenjem alata **Pristupi informacijama**, čime bi se unaprijedila praksa korištenja prava na pristup informacijama i podstakla proaktivna transparentnost javnih institucija.